

ta [outou] e rave ra » (Glenn L. Pace, « Crying with the Saints » [Brigham Young University devotional, Dec. 13, 1987], 2 ; speeches.byu.edu).

I te peresideniraa vau i te misioni no Kiev Ukraine, i te hoê taime ua ani au i ta'u tuahine misionare haapa'o roa a'e no te aha oia i haavî noa na ia'na, no te aha oia i faahapa noa na ia'na iho no te mau mea iti na'ina'i. Ua riro ta'na pahonoraa ei hi'oraa papû no te hoê taata e faaroo nei i te reo hape, ua na ô mai oia, « Eita ia e taata maitai atu â ia'u ».

Te mau taea'e e te mau tuahine, ta'u parau a'o i teie tuahine misionare, no outou atoa ia : a fa'i e a aro i to outou mau paruparu, eiaha râ e faaea noa i ni'a iho i te reira, i te mea ho'i e vai noa te tahi o ratou ei apiti no outou e tae noa'tu te taime e faaru'e outou i teie oraraa tahuti nei. Noa'tu e aha to outou ti'araa i teie nei, i te taime ihoa e ma'iti outou ma te hinaaro mau ia tatarahapa ma te haavare ore, ma te oaoa e ia na reira outou i te mau mahana atoa, mai te huru ra e, e tauahi mai te Taraehara a te Faaora ia outou ma te pee noa ia outou noa'tu te vahi e haere outou. Ia ora outou mai te reira te huru, « e vai matara noa ta outou mau hara » (Mosia 4:12) i te mau hora atoa o te mahana tata'itahi, te mau setoni atoa o te minuti tata'itahi, e e vai mâ noa outou e te au i mua i te Atua *pauroa te taime*.

No outou teie haamaitairaa, ia hinaaro outou, i teie nei e aore râ araua'e, ia ite ho'i outou no outou iho e, ua mauruuru te Atua ia outou noa'tu to outou mau hapehape. Te faa'ite papû nei au no te hoê Faaora here o te tia'i anaanatae nei ia ora tatou i te mau faaueraa. Te faa'ite papû nei au no te hoê Faaora here o te tia'i rahi nei ia horo'a i To'na aroha. Te faa'ite papû nei au no te hoê Faaora here o te oaoa nei ia faa'ohipa tatou i Ta'na Taraehara i te mahana tata'itahi ma te hau papû e te oaoa e, te faaruru ra tatou i ni'a i te avei'a mau. Te faa'ite papû nei au no te hoê Faaora here o te tia'i anaanatae nei « [ia] rahi to outou ti'aturi i mua i te aro o te Atua » (PH&PF 121:45). Na roto i te i'oa o Iesu Mesia, amene. ■



**Na Elder Eduardo Gavarret**

No te Hitu Ahuru

## E te Fatu, e pee atu vau ia oe

*Te ani manihini nei te Fatu ia tatou ma te faa'ohipa e rave rahi mau ta'o haa : « Haere mai ia'u nei », « Pee mai ia'u », « Haere mai na muri ia'u ». I roto i teie mau hi'oraa atoa, e aniraa ia haa.*

« I naha ho'i, te faatupu ra te Fatu i te taata no roto i to ratou iho nunaa e to ratou iho reo i te mau fenua atoa, ia haapii i ta ta'na ra parau ».<sup>1</sup> I teie mahana, ua tupu faahou teie irava inaha ua horo'ahia mai ia'u ia paraparau i to'u mana'o na roto i to'u iho reo.

I te matahiti 1975, te tavini ra vau i roto i te misioni no Uruguay-Paraguay ei taure'are'a misionare. I te ava'e matamua o ta'u misioni, ua faatupu te feia faatere oti'a i te hoê faaoaoaraa no te faahi'o i te hoê parau tumu o te evanelia. Ua haapohia te mata o te mau misionare tata'itahi, e ua parauhia mai e pee i te hoê e'a no te haere i roto i te piha faaoaoaraa o te fare pure. E riro matou i te pee i te reo o te hoê ti'a arata'i, te hoê reo ta matou e faaroo hou a haamata ai i te haere. Teie râ, ua faarahia mai matou e, e riro matou i te faaroo i te tahi atoa mau reo rau o te tamata i te faatapitapi ia matou e i te arata'i ê ia matou i te e'a.

Ua tau minuti rii to'u tari'a i te faarooora i te maniania, e te paraparauraa, e—i roto i teie mau mea atoa—te hoê

reo tei parau mai, « Mai pee mai », ua ti'aturi a'era vau e, te pee ra vau i te reo ti'a. I te taeraa'tu matou i roto i te piha faaoaoaraa o te fare pure, ua anihia mai ia matou ia tatarata i te mea i ni'a i to matou mata. E i to'u raveraa i te reira, ua ite ihora vau e, e piti pûpû e vai ra e tei roto vau i te pûpû tei pee i te reo hape. « E au ho'i te ta'i o te reira reo i te reo ti'a », ta'u i parau ia'u iho nei.

Ua vai noa teie ohipa i roto ia'u tei tupu a 39 matahiti i teie nei. Ua parau vau ia'u iho nei, « Eiaha roa, eiaha roa'tu e pee faahou i te reo hape ». E ua parau atoa'tura vau ia'u iho nei, « E te Fatu, e pee atu vau ia oe ».

Ua hinaaro vau i te faatu'ati i teie ohipa i te aniraa manihini a te Faaora ia tatou :

« O vau te tia'i mamoe maitai ra, ua ite au i ta'u iho... »

« E faaroo mai ta'u ra mamoe i to'u reo... ua ite au ia ratou, e e pee mai ho'i ratou ia'u ».<sup>2</sup>

Te aniraa manihini ia « pee Ia'na », o te aniraa ohie roa a'e ia e te afaro e te mana rahi ta tatou e nehenehe e farii. Te tae mai nei te reira mai roto mai



i te reo papû eita e nehenehe e hape.

Te ani manihini nei te Fatu ia tatou ma te faa'ohipa e rave rahi mau ta'o haa : « Haere mai ia'u nei », « Pee mai ia'u », « Haere mai na muri ia'u ». I roto i teie mau hi'oraa atoa, e ere i te hoê aniraa ia faaea noa ; e aniraa râ ia haa. E poro'i teie na te mau taata atoa no ô mai Ia'na, te Peropheta ho'i o te mau peropheta, te Haapii o te mau haapii, te Tamaiti a te Atua, te Mesia.

### **Te aniraa manihini ia « Haere mai ia'u nei »**

« E haere mai outou ia'u nei, e te feia'toa i haa rahi e tei teiaha i te hopoi'a, e na'u outou e faaora ».<sup>3</sup>

Outou e ere i te melo o te Ekalesia, e farii outou i teie aniraa manihini na roto i te reo o te mau misionare mai teie mau parau, « E tai'o anei oe i te Buka a Moromona ? E pure anei oe ? E haere mai anei oe i te pureraa ? E pee anei oe i te hi'oraa o Iesu Mesia ma te baptizo ia oe e te taata tei mau i te autahu'araa ? »<sup>4</sup> E nahea outou i te pahono i teie aniraa manihini i teie mahana ?<sup>5</sup>

Te ani manihini nei au ia outou ia faaroo e ia farii i teie poro'i ma te parau e, « E te Fatu, e pee atu vau ia oe ! »

Te farii ra o Carlos Badiola e to'na utuafare, no Minas, Uruguay, i te mau misionare. E no te rahi o te mau uiraa a te mau misionare i roto i te mau haapiiraa, ua faaoti ratou e ani manihini i te hoê melo ore e ora ra na piha'i iho noa—o Norma, e tamahine

14 matahiti e tamahine haaviti—ia haere mai no te tauturu ia ratou ia pahono i te mau uiraa. E piahi maitai roa o Norma i te haapiiraa tuarua e te tuatapapa ra oia i te Bibilia i te haapiiraa i tera matahiti, e no reira, ia ui mai te mau misionare i te hoê uiraa, teie o Norma no te pahono atu. Ua riro oia ei « taata imi auro ». Te haapiiraa i tera mahana ra, no ni'a ia i te Parau Paari.

I te ho'iraa'tu ona i muri iho i teie haapiiraa e te mau misionare, ua ite roa Norma e aha te rave atu. Ua parau oia i to'na metua vahine, « Mama, mai teie taime atu, eiaha faahou te taofe e te û na'u, te û noa râ ». Ua riro teie pahonora e faa'iteraa i mua i te mata no to'na hinaaro ia farii i te aniraa manihini ia pee i te Mesia, mai tuuhia mai e te mau misionare.

Ua baptizohia Carlos Badiola e Norma. I muri iho, no te hi'oraa maitai o Norma, ua baptizo-atoa-hia to'na metua vahine, to'na metua tane e to'na mau taea'e e tuahine. Ua paari maua Norma i roto i te hoê amaa na'ina'i e te puai. I muri rii mai, i te ho'iraa mai au mai te misioni, ua faaipoipo maua. I ite noa na vau e, e mea ohie a'e no'u ia pee i te Faaora mai te peu tei piha'i iho oia ia'u.

Te taata tei riro ei melo o te Ekalesia e tei farii i taua aniraa manihini nei, te faapî nei ia oia i teie fafauraa no'na i te hepetoma tata'itahi a rave ai oia i te oro'a.<sup>6</sup> Te hoê pae o teie fafauraa, o te haapa'oraa ia i te mau faaueraa, e a na reira ai outou, te parau nei ia outou e, « E te Fatu, e pee atu vau ia oe ! »<sup>7</sup>

### **Te aniraa manihini ia « Pee mai ia'u »**

E « Pee mai ia'u », te aniraa manihini a te Fatu i te taata tao'a rahi. Ua haapa'o teie taure'are'a tane i te mau faaueraa i roto i to'na oraraa. I te taime a ani mai ai oia e aha ta'na e ti'a ia rave faahou, ua farii mai oia i te hoê pahonora mai te hoê aniraa manihini papû : « A haere mai... a pee mai ai ia'u ».<sup>8</sup> Teie râ, noa'tu â te ohie o teie aniraa, eita ia e fariihia maoti te tahi tusia. Ua titauhia te tahi tautooraa—apitihia i te faaotiraa e te ohipa.

Ua tuu te peropheta Nephi i te uiuiraa i roto ia tatou iho a ui ai oia : « Ua parau maira [Iesu] i te mau tamarii a te taata nei : A pee mai na outou ia'u nei. E tena na, e au mau taea'e here, e ti'a anei ia tatou ia pee atu ia Iesu ra, ia ore tatou e hinaaro maite i te haapa'o i te mau faaue a te Metua ra ? »<sup>9</sup>

Te aniraa manihini ia « haere mai Ia'na », ia faaroo i To'na reo e ia pee i te reira, o te poro'i ia teie a te mau misionare mai te haamtaraa mai â, no te tauturu i te taata e rave rahi ia tau i to ratou oraraa ei mea maitai.

A pae ahuru matahiti i ma'iri a'enei, ua tomo mai te mau misionare i roto i te fare toa uati a to'u metua tane, no te vaiiho i te hoê uati ia hamanihia. E mai te mau misionare atoa, ua faariro raua i teie taime ei rave'a no te paraparau i to'u metua tane e i to'u metua vahine no ni'a i te evanelia. Ua farii to'u metua tane i te mau misionare, e ua farii to'u metua vahine i te poro'i e te aniraa manihini ia pee i te Mesia. Mai te reira mahana mai â e i teie nei, ua vai itoito noa oia i roto i te Ekalesia. Ua parau oia, « E te Fatu, e pee atu vau ia oe ! »

A tutava ai outou i te haere mai Ia'na, e apî mai outou i te mana no te faaora i te mau hopoi'a o te oraraa, i te pae tino anei e i te pae varua, e e ite mai outou i te hoê *tauiraa roto au, o te riro i te tauturu ia outou ia oaoa rahi a'e.*

### **Te aniraa manihini ia « Haere mai na muri ia'u »**

Ua piihia Enoka no te poro i te evanelia i te hoê nunaa paari e te aau eta'eta. Aita oia i mana'o ua ineine oia no te reira. Ua feaa oia e roaa anei ia'na ia rave i te reira. Ua faahau te

Fatu i to'na feaaraa ma te haapuai i to'na faaroo na roto i te aniraa manihini ia « Haere mai na muri ia'u »—e aniraa manihini teie, mai te tootoo a te taata mataru'i e aore râ te rima o te hoa, te nehenehe e arata'i i te taahiraa avae o te hoê taata taahiraa papû ore. Na roto i te raveraa i te rima o te Faaora e te haereraa na muri Ia'na, ua ite Enoka i te papûraa o to'na taahiraa e ua riro mai ei hoê misionare rahi e te hoê peropheta.<sup>10</sup>

Te faaotiraa ia « haere mai ia'u nei » e ia « pee mai ia'u », e faaotiraa ia a te taata hoê. Ia farii tatou i teie aniraa manihini, e teiteihia to tatou faito fafauraa, e i reira tatou e nehenehe ai e « haere na muri Ia'na ». Te faatupu nei teie huru faito i te hoê auraa piri a'e i te Faaora—te hotu no to tatou fariiraa i te aniraa manihini matamua.

Ua farii tata'itahi maua Norma i te aniraa manihini ia « haere mai ia'u nei » e ia « pee mai ia'u ». Ei reira, ua tahoê maua no te tururaa te tahi i te tahi, e ua haapii maua ia « haere na muri Ia'na ».

E faautu'ahia te tautooraa e te faaotiraa ia imi Ia'na e ia pee Ia'na na roto i te mau haamaitairaa ta tatou e hinaaro.

Tera atoa tei tupu i ni'a i tera vahine, e na roto i ta'na tautooraa rahi, ua roaa ia'na i te tape'a i te ahu o te Faaora<sup>11</sup> e aore râ mai ia Baretimaio te huru, te taata matapo, ua riro mai ta'na faaotiraa rahi ei taviri faatupu i te semeio tei tupu i roto i to'na oraraa.<sup>12</sup> I roto i teie na ohipa toopiti,

ua ho-mai-hia te hoê faaoraraa i te pae tino e i te pae varua.

A toro i te rima, e a tape'a outou i To'na ahu, a farii i Ta'na aniraa manihini, a parau, « E te Fatu, e pee atu vau ia oe ! »—e a haere na muri Ia'na.

« Haere mai ia'u nei », « Pee mai ia'u », « Haere mai na muri ia'u », e mau aniraa manihini teie ma te hoê mana roto—no te feia e farii i te reira—no te faatupu i te hoê *tauiraa i roto ia outou* o te riro i te arata'i ia outou ia parau e, « i ore ai [au] i hinaaro ai i te rave i te ino, ia rave râ i te maitai ma te faaea ore ».<sup>13</sup>

Ei faa'iteraa rapae no teie tauiraa, e riro outou i te putapu i te hinaaro rahi ia « aupuru i te feia paruparu, [ia] faateitei mai i te rima tautau ra i ni'a, e [ia] faaeta'eta i te mau turi avae paruparu ra ».<sup>14</sup>

E aha te mau taahiraa ta tatou e ti'a ia rave i teie mahana no te « haere na muri Ia'na » ?

1. *Faaamu i te hinaaro* ia riro mai ei taata pee maitai a'e i te Mesia.<sup>15</sup>
2. *Pure* no teie hinaaro ia tupu rahi mai to outou faaroo Ia'na.<sup>16</sup>
3. *Imi i te ite* i roto i te mau papa'iraa mo'a, no te turama i te e'a e no te haapuai i to outou hinaaro ia tau.<sup>17</sup>
4. *Rave i te faaotiraa i teie nei mahana* ia haa ma te parau e, « E te Fatu, e pee atu vau ia oe ! » Eita te iteraa i te parau mau e tau i to outou ao, ia faa'iro maoti râ outou i te ite ei *ohipa*.<sup>18</sup>

5. *Faaitoito noa* i roto i te faaotiraa ta outou i rave ma te faa'ohipa i teie mau parau tumu i te mahana tata'itahi.<sup>19</sup>

Ia faaitoito mai teie mau parau a to tatou peropheta here, te peresideni Thomas S. Monson, ia haa tatou i roto i to tatou hinaaro ia farii i te aniraa manihini a te Faaora. Ua parau te peresideni Monson : « O vai te Arii no te hanahana, teie nei Fatu no te mau nuu ? O Oia to tatou Fatu. O Oia to tatou Faaora. O Oia te Tamaiti a te Atua. O Oia te Fatu no to tatou faaora. Te tarape mai nei Oia, 'a pee mai ia'u'. Ua faaue Oia, 'e haere oe, e na reira atoa'. Ua taparu Oia, 'a haapa'o i ta'u mau faaueraa' ».<sup>20</sup>

Ia rave tatou i te faaotiraa i teie mahana ia faarahi i to tatou faito haamoriraa e fafauraa i te Atua, e ia riro ta tatou pahonoraa i Ta'na aniraa manihini i te hoê pahonoraa puai e te papû : « E te Fatu, e pee atu vau ia oe ! »<sup>21</sup> Na roto i te i'oa o te Fatu Iesu Mesia, amene. ■

#### TE MAU NOTA

1. Alama 29:8.
2. Ioane 10:14, 27.
3. Mataio 11:28; hi'o atoa Isaia 55:3.
4. Hi'o *Ia Poro Haere i Ta'u nei Evanelia: Te hoê arata'i no te ohipa misionare* (2004), 35, 223–232.
5. Hi'o Te Ohipa 2:37–38.
6. Hi'o Te Parau Haapiiraa e te Mau Parau Fafau 20:37, 77–79.
7. Hi'o Te Parau Haapiiraa e te Mau Parau Fafau 42:29.
8. Mareko 10:21.
9. 2 Nephi 31:10.
10. Hi'o Mose 6:33–35.
11. Hi'o Luka 8:43–48.
12. Hi'o Mareko 10:46–52.
13. Mosia 5:2.
14. Te Parau Haapiiraa e te Mau Parau Fafau 81:5; hi'o atoa Isaia 35:3.
15. Hi'o Alama 22:15–16; Dallin H. Oaks, « Te hinaaro », *Liahona*, Me 2011, 42–45.
16. Hi'o Alama 34:17–27; 37:37.
17. Hi'o Salamo 119:105; Helamana 3:29.
18. Hi'o Mosia 5:5.
19. Ua parau Ralph Waldo Emerson, « Ia rave-tamau-maite noa tatou i te hoê ohipa, e riro mai te reira ei ohipa ohie no tatou ia rave—e ere e, ua tau i te natura o taua ohipa ra, ua rahi atu râ to tatou puai no te rave i te reira » (i roto Heber J. Grant, *Gospel Standards*, comp. G. Homer Durham [1941], 355).
20. Thomas S. Monson, « Te imiraa i te oaoa i roto i te tere », *Liahona*, Novema 2008, 88.
21. Hi'o « Pee Au ia Oe », *Te mau himene*, n°. 131.



Bariloche, Ra-parata (Argentine)